

Plan for uttak av ved

I forvaltningsplanen er det ein plan for hogst og veding som oppfyller krava til dette i verneforskrifta. Nedanfor er eit utdrag av det som omhandlar veding. Ynskjer ein å gjere større uttak kan ein slå opp i forvaltningsplanen eller ta kontakt med verneområdeforvaltar for vidare rettleiing.

Planen er delt i ein generell del som gjeld for heile området, samt meir konkretiserte retningslinjer for dei mest verdfulle skoglokalitetane i verneområdet (A1-områda), og dei mest verdfulle kulturlandskapa (A1- og B1-områda).

Generelle retningslinjer

- Lukka hogstformer bør nyttast i verneområdet (unnateke ved uttak av granplantefelt)
- Eventuelle hogstflater skal ikkje overstige 3 dekar (unnateke ved uttak av granplantefelt)
- Fleirbruksomsyn skal vere dominerande i vurderingane vedrørende skogsdrifta
 - Område som vesentleg pregar skogsbiletet skal bevarast. Plukkhogst og tiltak for å oppretthalde ein livskraftig bestand er tillate.
 - Linjedrag i terrenget skal takast vare på.
 - Soner langs vassdrag; elvar, grøver, våtmarksområde og vatn skal bevarast for å ta vare på mikroklima og for å redusere erosjonsfare.
 - Bestand av edellauvskog og fuktskog skal ikkje hoggast ut.
 - I lauvskogliene skal det settast att ein del store tre, samt tre med god vekstkraft, for å behalde element av naturleg suksesjon i lokalitetane. Daud ved skal ikkje fjernast.
 - Område med stort artsmangfald og/eller innslag av raudlisteartar skal skjøttas med omsyn på desse verdiane.

Områdevise retningslinjer

For dei mest verdfulle områda er det laga spesielle retningslinjer for hogst og veding.

Ved å gå inn på denne linken:

<http://geocortex.dirnat.no/silverlightviewer/?Viewer=Naturbase&Project=2fbfd3b-2774-4d6a-8d45-0021b337c907>

får ein opp eit kart der desse områda er avmerka og nummerert fortløpande etter når dei er nemnt i forvaltningsplanen. Merk at grensene i kartet berre er omtrentlege, så ver uansett aktsam ved hogst og veding i nærleiken av desse områda. I alle høve gjeld dei generelle retningslinjene for all veding.

Områdevise retningslinjer for A1 skoglokalitetane i verneområdet (jf. kart over biologisk mangfald, vedlegg 4.2 i forvaltningsplanen)

1. Slufsa (gråor – heggskog)

Dette er ein frodig og tett skog med hovudsakleg gråor og hegg, men også med innslag av alm. Det finst også hasselkratt og bjørk.

Retningslinjer for hogst i området: Ein granbestand i sørenden av feltet bør avverkast snarast. Når dette er gjort, bør området få skjøtte seg sjølv, dvs. ikkje uttak av ved eller tømmer frå området.

2. Aust for Botnen (rik edellauvskog)

Sørvestvendt li med mykje alm og anna lauvskog. I området finn ein raudlistearta norddalsmarikåpe. Det er dessutan funne spor etter kvitryggspett.

Retningslinjer for hogst i området: Edellauvskogen bør få stå urøyvd, men det tolest meir beiting i området. Rydding av kratt av meir trivielle lauvtreartar, for å legge til rette for meir beiting, kan utførast på mindre felt i området. Ein skal likevel vere varsam med å endre mikroklimaet på lokalitetane til norddalsmarikåpa.

3. *Ljøvika – Hammaren (rik edellauvskog)*

Variert område med rik edellauvskog og gammal lauvskog. Også innslag av furuskog og hagemarkskog. Området blir beita med småfe. Området er uvanleg artsrikt. Gråspett og kvitryggspett ser ut til å hekke i området.

Retningsliner for hogst i området: Dei raudlista hakkespettane er knytt til lokalitetar med gammal skog, sidan føda for ein stor del består av vedbuande insekt. Det er difor viktig at området har naturleg suksesjon og ikkje vert utsett for hogst i stor skala. Uttak av ved i liten skala kan tolererast.

4. *Nedre Ljøen (rik edellauvskog)*

Søraustvendt li med rikeleg med sigevatn. Lokaliteten inneheld grov skog, der gråor og alm dominerer, men hengebjørk og hassel er òg vanleg. Platanlønn har fått godt fotfeste.

Retningsliner for hogst i området: Platanlønn bør ryddast ut av området. Edellauvskogen må få stå. Elles tolest moderat uttak av gråor og bjørk.

5. *Timbjørgane – Åkerneset (rik edellauvskog)*

Liside med topografi prega av rasfurer og grovålar. Veksling mellom rik edellauvskog–åreskog og rasmarker. Svært artsrik liside med fleire sjeldsynte artar for distriktet.

Retningsliner for hogst i området: Skogen i området bør skjøtte seg sjølv. Det er likevel ikkje til hinder for at utmarksslåttar og tunteigane på hyllegardane blir rydda for skog. Eventuelt uttak av ved bør skje frå desse areala.

6. *Bringa, vest for elva (rik edellauvskog)*

Liside eksponert mot søraust. Skogen vekslar mellom hengebjørk, alm og hassel. Skogen er forholdsvis ung. I området er det gjort funn av mnemosynesommarfugl og ei einsleg kvitkurle. Området er artsrikt.

Retningsliner for hogst i området: Restane etter ei granplanting skal hoggast ut. Elles bør området få skjøtte seg sjølv. Uttak av ved i mindre omfang kan akseptierast på trivielle lauvtreartar. Slik eventuell vedhogst kan gjerne leggest til dei no delvis skogkledde grasbakkane langs stranda.

7. *Bringa, aust for elva (rik edellauvskog)*

Bratt liside eksponert mot sør. Oppslag av alm–lindeskog med hassel og bjørk. Området inneheld også ei stor mengd hagtorn, eit sjeldsynt treslag i Møre og Romsdal.

Området er svært artsrikt, og det er her gjort funn av mnemosynesommarfugl.

Retningsliner for hogst i området: Gran og sitkagran skal hoggast ut. Elles bør det ikkje hoggast i området. Uttak av ved i liten skala, basert på trivielle lauvtreslag, kan akseptierast.

8. *Horvadrags – Knivsfålvane (rik edellauvskog)*

Bratt liside eksponert mot søraust. Skogen er karakterisert som ein frodig gråor–almeskog med eit godt innslag av mellom anna hengebjørk og hassel.

Retningsliner for hogst i området: Skogen bør stelle seg sjølv. Men området rundt tunet kan med fordel ryddast, likeeins eventuelle attgrodde utmarksslåttar (uttak av ved).

9. *Flåna (Urskog / gammalskog)*

Småkupert terreng med mindre kollar og knausar. Grov furu dominerer. I sørvestre del av området hellar terrenget nedover mot Verpesdalsvatnet. Her består skogen av blandingsskog med mykje frodig gråor–heggskog med innslag av bjørk og osp. Kvitryggspetten har hekka i lia ned mot Verpesdalen. Det er også gjort funn av brunburkne på ein olivinknaus i lokaliteten.

Retningsliner for hogst i området: Kvitryggspett er knytt til området med god tilgang på daud ved. Lisida nedover mot Verpesdalsvatnet bør difor ha ein stor grad av naturleg suksesjon for at kvitryggspetten skal halde fram med hekking i dette området. Det kan takst ut ved, men det må stå att ei vesentleg mengde eldre og døyande tre. Furuskogen oppe på Flåna bør stå mest mogeleg urøyrd. Området med furuskog har landskapsetiske verdiar, som bør takast vare på.

Områdevise retningsliner for A1 og B1 kulturlandskapsområda i verneområdet

10. *Botnen (naturbeitemark)*

Fråflytta buplass på vegen frå Norddal til Herdalen, omkransa av skog. Kratt og skog veks inn langs kantane.

Retningsliner for hogst: Kantane må ryddast for kratt og skog. Ei kantsone rundt innmarksareala bør haldast ope, med unntak kantsone mot vassdrag. Kantsona bør ha ei breidde på 10–15 meter. Skjøtsel av denne kantsona bør skje ved behov.

11. Herdalssetra (naturbeitemark)

Ein av dei mest særprega setredalane i fylket, med godt beitetrykk og lite attgroing.

Retningsliner for hogst: Det må prioriterast å halde oppe det opne landskapsinntrykket (den skoglause dalbotnen). Ved uttak av ved og eventuell skogsdrift bør ein prioritere områda i dalbotnen. Hogst bør skje langsetter dalsida, og bør skje ved behov.

12. Kilstisetra (naturbeitemark)

Området ligg ved nordvestenden av Kilstivatnet på vestsida av Eidsdalen. Området er i god hevd.

Retningsliner for hogst: Det er ikkje behov for auka uttak av ved eller tømmer.

13. Indreeidsdalen (naturbeitemark)

Sør for Indreeide ved Eidsvatnet ligg store areal med utmarksbeite. Areala er dels ope, dels med spreidde tre, dels med noko meir bjørkedominert skog. Noko av areala kan reknast som einerbakkar. Området er i god hevd med godt beitepress.

Retningsliner for hogst: Det vil vere ein fordel med uttak av bjørk i området, dessutan moderat rydding av einer. Hogsten bør helst skje langsetter dalsida.

14. Kvanndalssetra (naturbeitemark)

Setra ligg på ein liten knaus øvst i Geirangerdalen. Areala rundt setra har eit godt beitetrykk. Det er få teikn til attgroing.

Retningsliner for hogst: Det er ikkje behov for auka uttak av ved eller tømmer.

15. Verpesdalssetra (naturbeitemark)

Setra ligg i slakt hallande fjellside mot vest ovanfor Skrednakken. Området har attgroingspreg.

Retningsliner for hogst: Om mogeleg bør uttak av ved aukast. Områda nærmast stølen bør prioriterast. Fjellbjørkeskogen på knausar og ryggar bør stå att.

16. Skrednakken (naturbeitemark)

Hyllegard med store opplevingskvalitetar. I kulturmarka på garden er det funne to raudlista beitemarksoppar. Skog og kratt breier seg inn over slåtteteigane.

Retningsliner for hogst: Det er her viktig å oppretthalde eit oppe landskapsinntrykk. Slåtteteigane og kantsonene inn mot desse bør haldast fri for kratt og skog. Eventuelt uttak av ved og tømmerhogst må prioriterast mot desse areala. Det bør opprettast ein kantsone inn mot desse areala med ei breidd på 10–15 meter. Desse tiltaka vil truleg også gjere området meir attraktivt for beiting, som er viktig for å oppretthalde dei biologiske kvalitetane i området.

17. Smoge og Smogeli (naturbeitemark med innslag av tørrbakkeeng)

Hyllegard på austsida av Sunnlyvsfjorden med store opplevingskvalitetar. Området er ikkje omtala i rapporten om biologisk mangfald innanfor landskapsvernområdet. Ei vurdering av området i samband med ei utferd sommaren 2003 for forsøksringane i Møre og Romsdal gjer at området blir teke med i gruppa verdifulle kulturlandskap. Utfordringa for dette området er skogen som breier seg innover slåtteteigane. Særskilt skal nemnast eit tørrbakkesamfunn oppom husa på Smogeli.

Retningsliner for hogst: Slåtteteigane og kantsonene inn mot desse bør haldast fri for kratt og skog. Eventuelt uttak av ved og tømmerhogst må prioriterast mot desse areala. Det bør opprettast ei kantsone inn mot desse areala med ei breidd på 10–15 meter. Det kan vere aktuelt å hogge ned tre for å la desse ligge og rotne. Desse tiltaka vil truleg også gjere området meir attraktivt for beiting, som er viktig for å oppretthalde dei biologiske kvalitetane i området. Beitetrykket i området bør aukast monaleg.

18. Norddalsfjorden aust for Osvika (naturbeitemark)

Nordaustvendt lise som inneheld nokre botanisk sett interessante knausar og tørrbakkesamfunn, dessutan ei tørreng. Områda er attgroingstruga.

Retningsliner for hogst: Det bør takast ut meir skog frå området. Det er særskilt viktig å opne opp områda kring dei aktuelle tørrengene og tørrbakkesamfunna. Området langsmed vegen (stigen) mellom Osvika og Kastet må også prioriterast. Ein glissen skog vil auke beitekvalitetane til området. Det er sterkt ønskjeleg at ein tek opp att beitinga i området.

19. Kastet (naturbeitemark)

Hyllegard i den nordaustvendte lisida mot Tafjorden. Innmarka er i kraftig attgroing. Kvalitetane til området er knytt til eit ope eller halvope landskap i aktiv bruk.

Retningsliner for hogst: Det må her prioriterast å opne opp att landskapet, og seinare behalde det som eit ope eller halvope kulturlandskap. Innmarka og randsona rundt denne i ei breidde på 10 – 15 meter bør haldast fri for kratt og skog. Utslåttar bør ryddast for skog, og område med styvingstre bør rehabiliterast. Veding og hogst må prioriterast i desse områda. Elles vil alle tiltak i skogen som aukar beitinga i området vere positivt.

20. Kastesetra (naturbeitemark)

Seter i den nordvendte lia opp for Tafjorden. Sjølve setervollen er fri for skog, men i omgjevnadene finst lauvskog med bjørk. Nedanfor setra står det ein del grov furuskog. Området treng meir beiting.

Retningsliner for hogst: For at området skal vere attraktivt for beitedyr er det viktig at skogen ikkje veks att. Særskilt bør området rundt stølen oppretthaldast som eit halvope beitelandskap. Dersom uttak av ved i området ikkje er stort nok til å hindre attgroing av beitelandskapet, bør det settast inn tiltak for å hogge ned tre, og eventuelt berre la dei bli liggande og rotne. Tiltaket må følgjast opp med hardare beitepress.

21. Korsnes (naturbeitemark)

Hyllegard i den nordaustvendte lia mot Tafjorden. Innmarka er i kraftig attgroing på det djupaste jordsmonnet. På magrare mark finst enno artsrik naturengvegetasjon.

Retningsliner for hogst: Innmarka og kantsona rundt innmarksareala bør haldast fri for skog. For å ta vare på naturenglokalitetane trengst meir beiting i området. For at området skal vere attraktivt for beitedyr er det viktig å tilby eit halvope landskap. Det bør vurderast å gå inn og sage ned tre i dei tettaste områda. Tiltaket må følgjast opp med fleire beitedyr i området.

22. Korsneslia (naturbeitemark)

Seter som ligg oppe i den nordvendte lia mot Tafjorden. Setervollen er open, med nokre bjørketre, men i nedste delen er vollen i attgroing med bjørkeskog. Området treng meir beiting for å oppretthalde kvalitetane.

Retningsliner for hogst: For at området skal vere attraktivt for beitedyr er det viktig at skogen ikkje tettast seg til. Særskilt bør området rundt stølen oppretthaldast som eit halvope beitelandskap. Dersom uttak av ved i området ikkje er stort nok til å hindre attgroing av beitelandskapet, bør det settast inn tiltak for å hogge ned tre, og evt. berre la dei bli liggande og rotne. Tiltaket må følgjast opp med hardare beitepress.

For andre skogsområde gjeld dei generelle retningslinene. For naturreservatet Hyskjett er føremålet med fredinga å ta vare på ei av dei best utvikla edellauvskogslie i fjordstroka på Sunnmøre med det naturlege plante- og dyrelivet. Her er det ikkje lov å fjerne nokon tre, levande eller daude.